

摘藻堂四庫全書薈要

史部

欽定四庫全書薈要卷八千九十九

史部

硃批諭旨卷一百五十七

硃批何國宗奏摺

雍正四年五月初一日內閣學士兼禮部侍郎臣

何國宗等謹

奏為奏

聞事臣等於四月初一日至山東東昌府初四日撫臣
陳世倌會同查勘臣等條奏洩水支河查得東昌

府城南有七里河口下歸徒駭河城北有魏家灣
河口下歸馬頰河德州南四女寺有減水閘下歸
老黃河皆運河東岸洩水入海故道但年久淤塞
不通又查撫臣陳世倌所奏疏濬河道總計四支
內大鹽河原係通流小鹽河已准部覆現在疏濬
其馬頰徒駭河二道即臣等所奏洩水之支河其
餘細派各渠皆歸此四河以洩民田之水除逐一
詳細妥議回京具

奏外四月二十八日臣等看畢各州縣泉源至濟寧
州以次查看濟寧以南河湖淮河臣齊蘇勒咨會
至臺莊定議所有臣等查看山東河道大概情形
理合繕摺奏

聞謹

奏

爾等特蒙朕之差委勤慎二字時刻不容少間

雍正四年十二月二十日內閣學士兼禮部侍郎

臣何國宗謹

奏為奏

聞事臣於十一月二十日自省起程前赴各工查看查
得徒駭馬頰二河俱於十一月十九日開工御史
尤清王之錡現在各工辦理趙牛等七道支河已
飭各該州縣分定工段俟解凍之後逐漸挑挖可
以不致誤工而青黃不接之時亦於濱河貧民有
益好明年春月諒可次第成功南旺等湖斗門閘座

已經告竣現在查核會疏具

題安山馬踏湖堤亦已完工俟司道轉詳到日另行

查核

奏報戴村壩已於十二月十一日興工明歲春盡夏

必如

期告竣方好

初可以竣事至於芝麻莊黃河堤工素稱險要臣

細加查勘原係順溜衝灣有行所必行之勢前撫

臣陳世倌請開引河之處地勢較高恐引河雖開

而黃水仍復順勢北趨不由引河東注河臣齊蘇

勒所議甚當早在

皇上洞鑒之中臣查芝麻莊堤工原頂寬四丈底寬八

善政

丈今又加寬二丈堤後又加築隔堤一道埽壩各

待人而舉乃理之常

工果能歲修堅固可保無虞惟飭該道廳加謹修

防無容再議臣於十二月十五日回省與塞楞額
商議現今洩水支河閘壩工程亟需查估挑河疏
泉等事又待查勘擬合暫駐省城逐一辦理外所
有微臣查看各工情形恭摺奏

聞再臣

知道了
一路經過泉河水勢甚旺安山湖積水周圍三

十餘里中深三尺餘甚於漕運有濟明年糧艘諒

可早登

此不過少為助耳仍賴春雨接濟
天庾十一月二十九日大雪濟寧西南至河南境雪深

直隸

河南山西皆同日如是大雪實可慶幸之事

尺餘濟寧以北隨落隨消猶積五六寸十五日又
雪深三四寸民情安樂二麥兆豐足慰

皇上宵旰勤求至意合併奏

聞謹

奏

覽

雍正五年三月二十九日内閣學士兼禮部侍郎

臣何國宗謹

奏為奏

聞事竊查高津等七道支河皆以宣洩坡窪積水沿河
州縣即係上年被水地方先經署撫臣塞楞額與
臣商議擬於春初開工使濱河貧民得以藉工餬

口接至麥秋甚於地方有益業經具摺

奏明今於本年正月二十五等日次第興工約計閏
三月內外次第告竣戴村壩現已砌石椿底甚為
堅固臣親加量算按尺計價按日督工的於閏三
月內告成徒駭河工程共十一州縣內三州縣已
經完工其餘約計閏三月半全完馬頰河工程共
七州縣內二縣已經完工其餘因運河挑淺洩水
舊河淤塞不能暢流肩水倒塘未免稍稽時日臣

工完

往返查看御史尤清王之錡料理甚屬盡心作工

之日是非自見也

夫役亦甚踴躍節省之處甚多俟工完之日另行

核實造冊

奏報至各處泉源道路紆迴二千餘里臣一時不能

遍及惟汶水泗水正源大泉去壩工不遠臣擬親

分頭

料理甚是

往踏勘其餘小泉行令署管泉通判郎燦周歷巡

察務使如式疏濬以裨漕運現今運河閘口水深
六尺而湖水更盛重運可以遄行至上年被水地

方秋冬之間多食草子今河工銀米並發民間甚
有利益合并奏

聞謹

奏

覽

同日又

奏為敬陳下悃恭謝

天恩事雍正四年十二月十九日因山東州縣開銷供

應欽奉

上諭交部察議臣間

命之下慚悚交集無地自容茲蒙

皇上天恩不即加罷斥著臣明白回奏仰見我

皇上至仁如天至明如日跪聆

諭旨感激涕零臣惟益凜冰淵勉圖後效除據實備陳

具本送通政司

進呈外謹此繕摺恭謝

天恩伏祈

聖慈垂鑒謹

奏

慚愧與否自在汝等胸臆但不知汝等具何膽敢為如是具何心忍為如是朕殊不解

雍正五年閏三月初四日内閣學士兼禮部侍郎
臣何國宗謹

奏為恭報時雨霑足上慰

聖懷事竊山東地方自上年十一月及今年正月俱得
雨雪三月初九日微雨霖霖土膏潤澤麥苗肥盛
閏三月初三日臣查看徒駭河至武定州工次是
日酉時大雨竟夜不息至初四日辰時方止詢之
地方官民僉稱十分霑足二麥定然大獲此皆我
皇上敬

天勤民至誠感格是以好雨應節共樂年豐臣不勝歡慶
之至再河工挑濬將竣正在堆拍築堤得此雨澤

尤易堅固謹此具摺奏

聞上慰

聖懷謹

奏

覽所奏雨雪堤工情形深慰朕懷

雍正五年四月二十二日内閣學士兼禮部侍郎

臣何國宗謹

奏為奏

聞事查得徒駭河工程於閏三月二十二日全完御史
尤清逐工勘驗到省報稱如式告竣馬頰河及禹
津等支河七道亦陸續報完戴村壩由身已於閏
三月二十九日完工即將月壩拆開以備宣洩其
裹頭背後填砌修整之處總於四月內全完臣現
將已完各工清冊細加察核仍即前往各工逐一
勘驗銀工數目果否相符另行核實會疏具
題外先此恭摺奏

聞再查汶河泗河正源大泉臣前往查看俱已如式疏
濬各州縣小泉據署管泉通判郎燦查報亦俱一
律疏通合并奏

聞謹

奏

據奏工程完竣甚好爾所辦諸務業俱告成在東無事
作速料理旋京候朕另有委用

雍正五年五月二十一日內閣學士兼禮部侍郎

臣 何國宗謹

奏為欽奉

上諭事竊臣進摺家人齎回原摺一封奉

硃批諭旨據奏工程完竣甚好爾所辦諸務業俱告成
在東無事作速料理旋京候朕另有委用欽此查東
省河道工程錢糧重大須逐一勘核果係銀工數
目相符方敢具

題報銷今已完各工除禹津等支河撫臣另委員查

看外臣於五月十八日勘完馬頰河及徒駭河下游工程二十日轉至禹城縣徒駭河上游逐工勘驗擬由東昌府赴戴村壩收工約計五月內查畢回濟南府與塞楞額查核明白臣星夜回京復命為此具摺奏

聞謹

奏

朕因粵撫楊文乾為該省圍基奏請熟諳水利通曉測

量之大臣前往董理其事故有前旨昨孔毓珣到京面
商此事可緩而不行矣爾今不必速來徐徐查核明白
然後回京復命可也

雍正八年二月十四日工部侍郎臣何國宗謹
奏為奏

聞事竊北運河青龍灣修建減水壩開挑引河工程錢
糧關係重大蒙

皇上特命大臣會同臣辦理稽察其工程作法又著牛

鈕偕臣辦理臣仰邀

高厚殊恩惟有竭力盡心虛衷共濟以圖上報萬一茲
壩工河道於二月十二日興工臣偕莽鵠立等即
由引河向海口一路查勘其間有應舍灣取直無
礙民居之處臣等悉心商酌辦理其餘各處工程
應作何修築之處經大學士公馬爾賽等議令臣
同牛鈕再行查勘奏

間等因奉

旨依議欽遵在案臣同牛鈕查勘得河西務城北老堽
舊堤及要兒渡舊河口魚鱗壩俱當大溜頂衝最
為險要亟宜保護堅固方資捍禦據通永河道德
希壽稱河西務等處工程將該廳估報之處現在
駁查難據率轉等語臣查河西務要兒渡二處工
程極為緊要若俟該道廳往復駁核然後轉報請
修恐致遲誤合無仰祈

皇上俯念河工重大即於臣等所請引河壩工錢糧先

撥銀二萬兩飭發通永河道令其一面辦料興工
一面估報水利管田衙門請領還項庶無貽誤其
有作法未合之處臣同牛鈕商酌改正至三里淺
火燒屯等工程應如何修治之處臣從海口回日
一併會同牛鈕查勘奏

聞臣未敢擅便伏祈

皇上批示遵行謹

奏

覽所議工程修理之處緩急先後俱屬合宜

雍正八年三月二十四日工部侍郎臣何國宗謹
奏為奏

聞事竊臣同牛鈕於二月二十日抵海口復溯引河一
路細看二十七日回青龍灣將草壩工程逐項安
派并引河淺深堤身高下逐段估算畢三月初五
日沿運河兩岸踏勘除現在平穩及可緩工程飭
令該道廳照常隨時料理外查東岸三里淺一處

係歷來險工應建挑水壩一座並將舊鷄嘴壩重
加修整其堤灣洄溜處應修排椿一路又筐兒港
壩門上首一處急溜汕刷應建挑水小板壩一座
大板壩一座順水排椿一路又孤雲寺一處係大
溜頂灣排椿損壞應行修補西岸華家口一處係
舊河上口原有攔河壩一座連年頂衝汕刷僅存
靠堤陡岸壁立舊河地勢尤窪誠恐萬一疎失水
歸故道致阻糧艘應修葺工一段又張家莊一處

係新生險工老堤已經刷去僅存月堤仍係掃溜
應建挑水板壩一座後接排樁又火燒屯一處係
歷來險工舊有排樁應行修補又上年水漫堤頂
二十處曾經疊堰搶護應行加培以上各工據該
道廳共約估銀一萬九千餘兩除飭確加核減外
應請即令該河道一面動用道庫歲修錢糧給發
修理一面估報水利營田衙門如有不敷照例請
領臣未敢擅便伏乞

皇上批示遵行謹

奏

准照所議速行

同日又

奏為奏

聞事雍正八年三月初三日准都統莽鵠立等鈔移

奏摺內開筐兒港滾水壩金門寬高及引河堤工是
否允協有無應行另加修理之處請交與臣會同

牛鈕詳加查勘定議奏

聞等因奉

硃批諭旨是著落交給欽此欽遵移行到臣臣謹會同牛鈕查看得筐兒港減水壩引河工程除壩臺甚屬堅固海漫三合土微有衝刷數處深不過寸餘無容修補金門內所衝素土即本來地身同知朱斐文已經築實填平俱無庸議外其減水引河一道臣同牛鈕察看情形細加酌議先經原任通永

河道高鑛將壩門既加寬四十丈則其引河亦須
通身加挑寬四十丈仍將舊引河南岸廢堤拆去
方為暢順但工作浩繁曠日持久擬先於新引河
中間沿舊廢堤開挖深槽一道直達塌河淀寬十
丈深三四尺至六七尺不等並將河口淤高及舊
河內淤淺之處俱為開挑自然水流較暢再查塌
河淀下口有陳家溝舊河一道寬八九丈東堤頭
舊河一道寬六七丈賈家沽新河一道寬八丈計

河三道寬不及三十丈擬於賈家沽新河之旁再
開洩水河一道寬三十丈方足暢流歸海今先儘
力開挑或七八丈或十餘丈亦為有益均俟今秋
來春再加開廣挑濬完工其引河兩堤北岸係舊
工內有單薄二段應行加培南岸係新工所衝開
之處俱經同知朱斐文賠修完固其圍淀堤工汕
刷甚多俱在保固限內據同知朱斐文稱堤工內
外皆係淀池上年諸淀盈滿風浪排擊實屬人力

難施應請援例准六賠四等語擬請先動錢糧修理完固其應如何賠還之處統聽水利營田衙門核議勒限賠還以上工程約共需銀四萬餘兩臣擬即咨請水利營田衙門動撥錢糧飭發通永河道令其一面即日興工一面分晰造冊申報查核至減水壩金門寬高與全河相為消息原議水小則加疊土堰蓄水刷河水大則開放以俾暢洩上年伏汛後加築席土堰一道高三尺餘秋汛長水

未曾過堰今青龍灣又分減於上流臣與牛鈕細
加計議應請俟伏秋時詳察水勢通盤合算再行
條議奏

間臣未敢擅便伏乞

睿鑒批示遵行謹

奏

依議作速料理少有遲誤疎虞惟何國宗是問凡一應
動用錢糧亦與牛鈕無涉何國宗一人察核可也

硃批諭旨卷一百五十七



總校官庶吉士臣侍朝

校對官編修臣馬啟泰

謄錄監生臣吳向仁

欽定四庫全書薈要

史部

硃批諭旨卷一百五十八

詳校官編修巨繆晉

欽定四庫全書薈要卷八千一百

史部

硃批諭旨卷一百五十八

硃批博爾多奏摺

雍正元年六月十八日戶部銀庫郎中臣博爾多
太僕寺少卿臣須洲謹

奏為恭請

皇上萬安事欽惟

皇上德合乾坤



心通造化

和神爽氣身備春秋

玉色金聲光昭日月自

聖祖仁皇帝龍馭上賓哀毀骨立又遇

皇太后鶴輶仙逝悲慟神傷兼之

念切蒼生

神周赤縣但求百姓之樂幾忘

聖體之勞臣奉

使以來身居山左心繫

闕廷惟溽暑之未消冀

聖躬之調護敬抒寸悃恭請

萬安臣不勝犬馬依戀之至謹

奏

朕安覽爾等所奏雨澤并地方情形朕懷深慰摺暫留
中爾等其殫心竭力料理於此兩月內必不令窮黎有
一人填於溝壑方為不辱朕之使命也勉之

雍正元年七月初九日戶部銀庫郎中臣博爾多

謹

奏為恭報賑務事竊臣蒙

皇上天恩差往山東查明饑民動帑賑濟於六月十六
日前至濟南見雨水充盈秋禾茂盛即於十八日
具摺奏

聞外隨會同山東巡撫臣確議照麥收歉薄之處於濟
充東青四府屬及萊州府高密即墨二縣分別大

中小州縣衛所動帑賑濟大州縣發銀三千兩中
州縣發銀二千五百兩小州縣發銀二千兩衛所
發銀一千五百兩共九十八處實動藩庫銀二十
二萬四千兩於六月二十三日公同驗明兌發各
府轉發各屬飭令確查實在乏食窮民按口給散
務使窮簷蔭屋盡沐

皇恩

臣

於七月初九日親赴各屬巡查仰遵

聖訓務使無一人填於溝壑以副

聖主愛民如子之心再東省於發銀之後二十七至二十九三日連得雨澤各種禾穗俱碩大圓滿父老子弟咸慶豐收至截留漕糧

欽差部員於本月初五日到濟臣同撫臣黃炳少卿臣須洲郊迎跪請

聖安深慰犬馬依戀之意其漕務事宜撫臣已繕疏具奏合併聲明謹

奏

知道了勉力自惜更當約束隨從人等毋得倚仗欽差之勢騷擾地方

雍正元年八月十二日戶部銀庫郎中臣博爾多謹

奏為奏

聞事竊臣於六月二十一日入山東境內即留心地方官員賢否風聞藩司佟吉圖聲名狼好糧道余甸操守亦好到濟之後二員一被叅拏即有士民曲

文彬等百餘人環繞臣門具呈懇請

題留以慰輿望臣不敢據一時之見聞冒昧奏

聞及臣親赴各屬查賑單身密入村莊見百姓有聚談
佟藩之事者莫不咨嗟歎息感激好官七月十八

日臣至濟寧州值佟吉圖解審河南百姓喧傳欲
罷市保留其經過之處往往如此臣受

聖主深恩故敢不避越職之罪冒昧據實奏

聞伏祈

睿鑒謹

奏

聲名雖好亦何能抵罪

同日又

奏為遵

旨會審事竊臣於八月初六日回濟初七日即會同撫

臣審理奉

旨所交李元龍一案嚴審李元龍據供家產實係盡交

王二掌管夾訊王二及夥紀李先實俱堅供花費
無存止剩房產等項於初十日覆加嚴訊仍然供
吐游移臣現與撫臣酌議詳加嚴審務得實情再
行具摺奏

聞謹

奏

貪吏之私人莫非助虐棍徒同黃炳嚴加審追

硃批諭旨卷一百五十八

欽定四庫全書薈要卷八千二百一

史部

硃批諭旨卷一百五十九

硃批萬際瑞奏摺

雍正三年九月十八日廣東提督臣萬際瑞謹

奏恭請

皇上聖安

朕安

昨董象緯來京陛見其人甚不足取爾其勉力盡職為

一良帥與朕顏面增光毋致被其嗤笑

同日又

奏為欽奉

上諭事雍正三年九月十二日接兵部劄付內開七月

二十一日奉

上諭萬際瑞來京時曾經面奏海防會汛一事殊屬不便朕諭同總督孔毓珣詳議具奏近朕訪問熟悉海洋情形之人多稱水師會哨於弭盜之法實為有益

據其所奏俱各甚有條理爾部可行文與萬際瑞且不必會同總督令伊先與熟悉水師之人如瓊州總兵黃助等將會哨實在有益之處會同詳加酌議此外有諳練海洋情形者亦廣加採訪將情由先行具摺奏聞再與總督會同議奏欽此為此合劄該提督欽遵施行等因到臣竊查海防會哨由來已久雖亦有益但洋汛遼濶一望無涯定例二月六月出巡配撥兵船揚帆遠去本汛前後未免空虛迨至

回汛經時久遠恐有姦船乘機竊發或致疎虞此
臣所以鯁鯁過慮也茲奉

諭旨會同新授瓊州總兵臣黃助詳加酌議粵省洋面

東西袤延約數千里微臣歷任雷瓊東洋雖未深

知西汛一帶皆所熟悉自龍門協而東海安營碇

州營吳川營電白營春江協廣海寨香山協沿海

水師聯絡布置分據險要臣等愚見各營分遣遊

守等官龍門協巡至海安海安營巡至碇州碇州

營巡至吳川吳川營巡至電白電白營巡至春江
春江協巡至廣海廣海寨巡至香山自香山東至
南澳亦一體交環無事則來往遊巡保固汛防有
警則奮力追擒無分疆界上下各汛聯絡循環交
相巡哨則姦船自無可乘之隙矣且所巡洋面易
於遍歷務限一月之內往復一週始則自東而西
繼則自西而東各取地方官印結查驗以杜中途
停泊之弊再或按季輪委總兵副將一員親歷巡

查以稽察各汛之勤惰如有巡哨不力者立即揭
叅徇情容隱一併嚴加議處庶交相警勵不敢怠
玩偷安羣力畢宣汛防各密海疆永獲寧謐之休
矣此臣等管蠡之見以為各汛聯絡時巡較之會
哨更為周密也再自香山東至南澳水師各營尚
未深悉容臣到任後逐一詳查如外有諳練海洋
情形者亦廣加採訪另具摺

奏謹將水師會哨一事遵

旨先行繕摺差瓊州鎮標把總齎捧奏

聞謹

奏

此係極有關係之事不宜固執已見當與督撫孔毓珣
楊文乾等悉心熟議籌畫萬全而行既非目前急務何
必忙迫詳加斟酌可也

同日又

奏竊臣質本庸愚謬膺重寄夙夜惴惴恐致隕越凡

有可以寧謐海疆之計莫不深思熟慮以期仰報
聖恩於萬一伏查瓊州一郡孤懸海外夙稱險要郡北
十里則有白沙海口諸港商船輳集洵為瓊治之
咽喉已設水師副將一員兼轄瓊山文昌會同澄
邁臨高五縣港汛哨船一十四隻分巡守隘布置
得宜誠無可慮惟崖州一營離郡千里逼近安南
實為全瓊之後戶所轄汛地橫亘海面四百餘里
除小港不計外內有大蛋保平三亞榆林赤嶺望

樓大港六道各設礮臺防守港外悉連大洋其衝
要處所較之各州邑為多在在可以泊船巡防更
宜加密雖有遊擊一員駐劄州城職非水師兼無
船隻設有警息未免束手無策臣身任封疆不得
不思及未雨綢繆之計請於崖營遊擊一缺改設
水師設立哨船分防要汛東至萬營之桐棲港西
至儋營之英潮港洋面毗連俱屬險要輪撥汛弁
不時游巡與海口之水師協上下會哨則南北交

嚴東西兼顧全瓊處處皆成芑桑之固矣微臣深知崖營甚屬緊要敬陳一得之愚至於設立哨船作何設法應請

皇上勅下督撫二臣逐加詳議非臣愚昧所能擅及也為此具摺

奏請伏祈

睿裁謹

奏

崖營改設水師是否合宜會同督撫臣酌商具奏

雍正四年四月初八日廣東提督臣萬際瑞謹

奏為恭報地方米價雨水情形事竊粵東自入春以來雨水不一除高雷廉三府雨水調勻米價每石七八錢不等南韶瓊三府雨水未多米價每石一兩一二錢不等外其惠潮廣肇四府去歲歉收今春復陰雨連綿米價近日漸至二兩一石至潮州各屬先於二月內每石即長至二兩四五錢再碣

石南澳二鎮綠地處海隅商販不前升斗難求臣

目擊維艱咨商督撫二臣隨將潮府各邑倉穀酌
量動支分發平糶陸續接濟民食并撥鄰近州縣
倉穀分運碣石南澳二鎮平糶招徠商販米價稍
平茲三月二十外天氣方晴積水漸退禾秧現在
及時種插或豐或歉俟收穫之後容臣另摺

奏報至廣州府城亦因米價騰貴設立官廠平糶米
穀四月初六日據廣州城守副將賀捷稟稱三月

三十日省城附近男婦多人因赴各廠買米喧嚷
爭鬧遂擁至撫臣衙門將頭門打開擁入大堂毀
爛堂上什物經撫標官兵驅逐趕散拏獲數人尚
未發落等因到臣身任封疆不敢壅於上

聞理合將地方情形雨水米價一併繕摺奏

聞謹

奏

此事已據楊文乾備悉上聞矣所奏知道了

前董象緯到京奏稱若論戎行效力究竟旗員勝似漢人且更有卑鄙狹小之語朕因曉諭云我朝自

世祖定鼎

聖祖相繼撫御寰區以來八十餘年深仁厚澤淪肌浹髓凡有血氣者莫不尊親無論旗漢誰非臣子悉皆一體輸忠爭相報效寧有彼此之分況當日三逆之變漢臣中多有盡節者旗人內亦有從叛者安見漢不如旗即以目前比較楊琳孔毓珣某臧某否董象緯萬際瑞孰

優孰劣爾試思之當據董象緯覆奏孔毓珣原強似楊
琳萬際瑞則遠不如臣隨歷數汝之不及伊處朕向伊
云俟萬際瑞到任受事後果不及爾朕則閉口無言矣
曾經降有如斯諭旨汝若不加勉自勵被董象緯之竊
笑當為何如耶不但不及董象緯倘所行之事被人指
摘談論仰面對

天於心安乎將此諭時時捧誦黽勉奉行毋少怠忽庶副
朕望

雍正四年七月二十四日廣東提督臣萬際瑞謹
奏為恭謝

天恩事雍正四年七月十二日臣齋摺家人回粵恭捧
皇上欽賜各種藥錠到臣即望

闕叩頭謝

恩祇領訖所有臣奏地方米價雨水情形摺內欽奉

硃批諭旨臣跪誦之下惶悚靡已竊念臣邊海庸愚才

疎識淺蒙

皇上隆恩畀以廣東提督重任汲深綆短殊多隕越但
臣心有餘惟恐才力不逮非敢自棄於

君父之前今蒙

皇上推心置腹令臣時時黽勉奉行更念粵東地處炎
方

特頒仙錠以備時用臣之遭逢實千古所希有惟有殫
心竭力益加砥礪以仰報

高深於萬一耳所有欽奉

硃批諭旨并微臣感激蟻悃理合繕摺

奏謝謹

奏

覽奏知道了大凡居官第一操守為要至辦理諸事切戒自是當集思廣益取衆善以為己用乃封疆大臣最所當務者也勉之

同日又

奏為恭報粵東夏禾收成惠府秋水汎濫事竊照粵

東自四月以後雨水調均早禾秀實收成俱有八
分惟潮府沿海一帶地土瘠薄止有七分今通省
米價一兩内外不等潮屬稍貴但二季晚禾又經
及時種插可慶大有詎意七月十六日颶風暴雨
陡發異常兵民房屋多被吹倒兼靈雨連綿至二
十一日始晴而洪水泛漲惠府與歸善縣皆成澤
國四面汪洋城內街巷兵民出入俱乘小艇各處
房屋多被水淹倒塌二十二日水勢愈長博羅縣

亦被水淹至惠協及臣標中左右前四營遊擊衙署盡被水淹城廂兵民俱奔高處城上棲身臣與地方官多雇船隻在城廂內外巡視救護被水難民加意防範多方撫恤不至失所外至於城垣房屋倒塌丈尺間數與人民有無淹斃以及惠屬之各州縣曾否被災俟水退之日備細查明另行摺奏所有惠府被水情形理合繕摺奏

聞謹

奏

惠州等處被水據楊文乾業已奏聞宜教導兵民人等
消弭災眚之道常存善心毋造惡業力行好事敬信

神明則地方上自無此等事矣今當被災之際彈壓匪類
不致乘機生事極為要務慎之

雍正四年九月二十日廣東提督

臣萬際瑞謹

奏為鎮

臣

貪鄙徇私事竊照總兵一官為封疆大臣

務宜廉潔持躬端方矢志方可表率將備整飭營

伍今查得碣石鎮總兵官陳良弼處已不端穢行
昭著任用字識孔超家人王祖苛索漁船規例每
漁船一對索銀八兩汕尾港內共收銀六百六十
兩右營把總張隆經收交駐碣提塘康熙帶繳鮑
門港共收銀三百三十兩係右營千總楊忠收繳
以致右營守備廖勇每對漁船亦索取規例銀三
兩六錢毫無顧忌右營港內如此中左二營可知
臣訪聞既確何敢徇隱理合據實密

奏伏乞

皇上睿鑒施行謹

奏

陳良弼係一老將且又熟諳水師似此歷練之員殊屬
難得若猶不至曠廢營務虧缺職守當彼此和衷勗勉
遷改爾等提鎮不能一德同心與地方無益所奏朕頗
不以為然觀此爾甚乏調停作用也

同日又

奏為報明田禾城舍被水衝塌事竊照粵東惠郡於
雍正四年七月十七至二十等日颶風大雨洪水
泛濫先經臣將被水情形繕摺具

奏續據惠協副將稟報七月二十四日水勢方定計
高二丈有餘於次日漸退府城四門被水淹浸共
倒卸城垣二十餘丈歸善縣城垣共倒卸十餘丈
田禾俱被水淹府縣城廂內外以及鄉莊共倒房
屋數千餘間又據臣標右營遊擊稟報河源縣因

七月十七至二十等日風雨交作河水漲發老城
倒壞八缺新城倒壞四缺民房漂流無數等情又
據惠協左營都司稟報博羅縣七月十八九等日
連朝風雨洪水泛濫沿江十五圖田地低窪者盡
被水淹城鄉房屋共倒塌千有餘間等情又據東
莞營守備稟報廣州府屬之東莞縣七月二十外
水勢泛漲兵民房舍倒塌無數等情又據增城營
遊擊稟報增城縣七月二十等日潦水湧漲田禾

被水淹浸民房倒塌無數等情又准潮州總兵咨

報程鄉縣七月十七八等日颶風大雨洪水暴漲

城內水滿二尺城垣倒卸九丈城鄉內外兵民房

屋倒塌甚多等因又據惠來營遊擊稟報惠來縣

七月十六日起風雨七晝夜兵民房屋多有倒塌

所種晚禾二三分俱被水淹低田衝決等情又准

高州總兵咨報廉州府七月初八日起至十二日

止狂風大雨倒卸城垣二十餘丈等因又據羅定

協副將稟報羅定州七月十九日至二十五日霖
雨淋漓溪河湧漲州城近河城垣倒卸十有餘丈
田禾房舍幸無大損等情各到臣臣查以上被水
州縣惟程鄉縣淹斃男婦四口其餘並無傷損至
於各屬營汛塘房墩樓排柵倒爛甚多除咨會督
撫二臣檄飭文員將城垣塘汛速行修葺以固地
方外詎惠府於八月十六七八等日大雨滂沱連
綿不息洪水復漲較前雖小二尺而歸善博羅東

莞三縣沿江一帶以及廣州府屬之增城縣山水
匯發兵民房舍復有傾頽晚禾補插者悉行淹壞
秋成恐致歉收臣身任封疆理合繕摺奏

聞謹

奏

地方上一切災祥自應絲毫無隱據實奏聞爾等職任
封疆遇斯等事全賴從容調度撫恤彈壓若聽信小人
妄言驚惶失措以致搖惑衆心則汝難辭其罪也

同日又

奏為報明馬價羨餘急公修造兵房事竊惠郡連遭洪水業將民舍城垣倒卸情形另摺

奏明茲有臣標五營內共倒兵房二百五十五間每間估計銀四兩需用修造銀一千零二十兩此項銀兩即於五營馬價內之羨餘動用查東省馬價每匹額定銀二十一兩九錢臣委員廣西購買或十二三兩或十五六兩不等每年總計羨餘有千

金以外臣先因五營廬甲新舊不一無以壯營伍而收實用原擬

奏明捐造廬甲今兵丁棲止無所現存有餘銀八百兩不得不先行修造俟再有盈餘另為製造廬甲等項至於五營中之器械惟鳥鎗略為短小本年五月內督臣孔毓珣捐銀五百兩臣即興工打造鳥鎗六百桿已經工竣除給發各兵操演外理合繕摺一併奏

聞伏乞

皇上睿鑒施行謹

奏

此舉甚是凡事有緩急先後之宜須權其輕重為之豈可固執而不通融耶

雍正五年八月初十日山東登州總兵官

臣萬際

瑞謹

奏為奏

聞事竊照東省登萊青諸郡沿海一帶應行修築礮臺

十九座經前任撫臣陳世倌與前任鎮臣黃元驤

會同委員先築八角口礮臺一座以為成式續將

文登營轄汎成山衛之龍口東崖文登縣之馬頭

嘴北岸寧福營轄汎萊陽縣之丁字嘴即墨營轄

汎即墨縣之嶠山膠州營轄汎膠州之唐島口安

東營轄汎諸城縣之亭子蘭六處礮臺興工修築

又經前任鎮臣黃元驤具疏

題報在案嗣據各該營陸續呈報亭子蘭馬頭嘴丁

字嘴龍口東崖唐島口嶠山等六處俱已修築完

工經臣逐加親驗六處所修礮臺工程俱各堅固

一如八角口礮臺之式又查有萊州營轄汎掖縣

之三山口礮臺現在興工修築尚未告竣其餘未

曾興工修築礮臺十一座內有文登營轄汎成山

衛之養魚池膠州營轄汎膠州之古鎮口即墨營

轄汎即墨縣之黃龍莊安東營轄汎日照縣之龍

江口四處亦屬緊要趁此天長日暖秋收之後正

可修築

臣現在咨明撫

臣

塞楞額檄飭該地方官

照式繪圖估計興工在案其餘七座內有

臣

標右

營轄汎黃縣之礪礪島乃一條沙線生出海面十

數餘里離村頗遠竝無船隻灣泊經

臣

查驗實係

僻處應移築於膠州營轄汎浮山所之青島口此

島為膠州門戶乃船隻灣泊之所實係衝處又有

文登營轄汎寧海州之南橫海面雖無沙石但口

門太敞船隻難泊亦非緊要之地應移築於文登營轄汎寧海州之黃島此島與南橫相去十里可以灣泊船隻實係衝處一轉移間二處所築礮臺俱收實濟而錢糧亦不至虛費矣理合繕摺

奏請可否容臣咨商撫臣塞楞額將礮礮南橫二處礮臺移改伏乞

皇上睿鑒施行謹

奏

移僻就衝甚善與塞枵額商酌行之

雍正六年二月初十日山東登州總兵官革職留

任臣萬際瑞謹

奏為請

旨事竊查臣屬武定營轄汎余家港地方係鹽徒出沒

要口經前任撫臣陳世倌於雍正二年十二月內

題明將本營守備帶領馬步兵丁八十名移駐專司

巡緝於雍正三年四月內該處闔商公呈長蘆鹽

臣莽鵠立議以完課銀兩內每銀一百兩外加銀一兩以助移駐官兵薪水之資經莽鵠立批准每年該汛守備差目兵赴鹽政衙門領回散給查守備一年得助銀二百四十兩馬兵二十名得助銀四百八十兩步兵六十名得助銀七百二十兩一年共計銀一千四百四十兩但臣思守備自有俸薪養糧兵丁各有月餉養贍其移駐汛防捍衛地方巡緝私販分所當然何必有資助之私臣受

恩深重不敢徇情欺隱理合據實

奏明請

旨將此項銀兩可否歸於正項鹽斤之內伏乞

聖裁遵行謹

奏

此項銀兩不關國計民生出於衆商樂從何必裁革過
為苛刻但母因此一奏奉有朕諭遂乃自以為利則更
不可也

雍正六年四月二十一日山東登州總兵官革職

留任臣萬際瑞謹

奏為敬抒管見仰祈

睿鑒以備採擇事竊臣謏劣庸才屢多罪愆荷蒙

高厚之恩優容格外夙夜思維無可報稱苟有一得之

愚曷敢緘默不言請為我

皇上敬陳之

一武科鄉試錄宜分別進

呈也查文科賓興之期

欽命廷臣典試撫臣為之監臨中式之後將試卷送部

磨勘

國家造就人才之至意已詳且盡矣惟武科一途外
場弓馬技勇以及內場文字俱屬撫臣之專任其
中才技各有短長未免公私莫辨臣愚請嗣後於
鄉試錄上令撫臣註明弓馬技勇文字三項進

呈或內外場俱優或外場好而內場平常或內場好

而外場稍次者俱分析註明進

呈并行咨部查核俟會試之年將內場優而外場稍次者另編衛字號先期奏

聞名數

欽定中式若干名以備衛所之用其武進士前一半選授營缺後一半選授衛缺之例似可變通停止倘新科武舉內有文字荒謬弓馬技勇不堪者或被主考糾叅或被部臣彈劾將撫臣議處至歷科武

武場原非要務較之行伍中人材實屬不及至於武舉舉內有文字清通願歸於衛字號內者伊等起文
會試之年具呈該地方官詳明上司聲明報部與
大都賄買者居多更不堪問矣
新科一體編入號內會試如此則名器慎重而實
收得人之效矣

一盜首住址州縣宜分別議處也查雍正四年七
月內九卿會議欽奉

上諭一案嗣後編排保甲地方官有不實力奉行不能
稽查盜賊或別經發覺或經科道糾叅將需管州

縣官照不能察緝姦民例降二級調用兼轄統轄
各官照例議處等因奉

旨著以一年為限欽遵在案又定例承緝各官務期必
獲盜首如不獲盜首雖獲賊過半於免罪之外仍
罰俸一年限一年緝拏限滿不獲罰俸二年再限
一年緝拏再不獲降一級留任等語是盜首之重
於夥盜也明矣但並未嚴定有盜首住址州縣分
別議處之例則承審各官止以已經拏獲一語結

保甲

社倉二事最為難行不得賢能有司徒滋紛擾耳

於地

案是保甲之法究未能實力奉行臣請嗣後凡拏

方何益此非強迫而為遂可冀收成效者

獲盜首審訊住址州縣如本案盜首係本地方人

而本州縣自行拏獲者或係別州縣人而為該管

地方官自行察出拏獲到案者俱從寬免其處分

如本案所獲盜首非係本州縣人將供出住址州

縣之專兼各官職名照不能察緝姦民例叅處保

甲排頭一體治罪倘鄰近地方官拏獲盜首係伊

住址本州縣案內之犯除拏獲鄰近之地方官仍

照例議叙外應將本案之州縣官亦從寬免議以
便互相協力緝拏如鄰近地方官拏獲盜首非伊
住址本州縣案內之犯別入鄰境為盜首者仍將
該管地方專兼等職名照例叅處至本案盜首自
行首出并夥盜內首出盜首者係伊住址本州縣
案內之犯將專管州縣各官均應從寬定議以杜
諱縱審係別州縣住址者仍將專管各官照例議
處其有捏稱盜首病故并將夥盜嚇認盜首嫁禍

於別地方者經該管上司審出指名

題叅從重議處倘該管上司不行詳審朦混結案經別案發覺將該管上司一并嚴加議處如此則保甲嚴而盜風息矣

以上二條臣不揣愚陋謬陳管見是否可採伏祈皇上睿鑒施行謹

奏

捕盜處分不妥協處非止一端實因出於無可如何之

故處分輕則愈肆懈弛處分重又難免諱匿葢疎密皆非寬嚴兩礙適中之法奚從而得盜風之息要在文武大吏公正嚴明實心任事方為拔本塞源之道若只於例限處分內講究是所謂緣木而求魚也庸有益乎

同日又

奏為請嚴積引之弊以裕

國課事竊臣一介武夫識見淺陋於鹽政事宜尤多未諳緣莅任東省一載有餘凡遇營汛拏獲私鹽

一經交縣便稱有引開釋臣實未解其故隨細心
訪察始知東省每年有積引二十六萬餘道俱係
截角殘引以資其營私之弊一遇拏獲到官將殘
引重複影射姦商侵蝕牢不可破今雖查出而每
年可增數萬兩之引課已暗耗於積引之中臣身
任封疆杜絕私販係臣之責是以據實入
告伏乞

皇上委員徹底清查庶姦商知所畏懼而可增之引課

不至飽若輩之私橐矣理合繕摺具

奏伏祈

皇上睿鑒施行謹

奏

所奏可嘉另有諭旨

雍正六年五月十九日山東登州總兵官革職留

任臣萬際瑞謹

奏為恭謝

天恩事雍正六年五月十二日

臣齋摺家人回登恭捧

御賜各種藥錠到

臣臣

跪迎至署望

闕叩頭謝

恩祇領訖當將

奏摺啓視欽奉

硃批盜風之息要在文武大吏公正嚴明實心任事方
為拔本塞源之道若只於例限處分內講究是所謂
緣木而求魚也庸有益乎欽此

臣跪讀之下仰見我

皇上睿謨廣遠弭盜務在清源

臣謹遵

旨檄飭將弁訓練巡防實心任事公正嚴明毋負職守

以期仰報

高厚於萬一為此繕摺

奏謝所有奉到

硃批奏摺一併恭繳伏乞

皇上睿鑒謹

奏

覽

所奏知縣關拮一摺留中候另有諭旨內外大臣悉皆如是秉公無隱事事據實入告毫弗瞻顧何慮天下不大治耶勉之勉之更莫改移此志

雍正六年六月二十一日山東登州總兵官

臣萬

際瑞謹

奏為恭謝

天恩事雍正六年六月初四日

臣

齎摺家人回登恭捧

皇上御賜新花樣紗二聯到臣臣隨恭設香案望

闕叩頭謝

恩祇領訖伏念臣邊海庸愚愆尤屢積荷蒙

皇上宥過之仁不加擯棄已屬過分何當

溫旨加勉復叨

寵賚覩雲霞之璀璨捧出

鳳城瞻綺綉之輝煌頒來

天府芬芳四季豈惟開放千紅飛舞盈圖寧止疊臻

百福臣何人斯遭此

曠典

聖恩愈厚報稱愈難惟有竭盡駑駘益矢氷兢仰酬
高厚於萬一耳所有微臣感激之私理合繕摺

奏謝并將奉到

硃批奏摺一併恭繳伏乞

皇上睿鑒謹

奏

覽奏謝知道了凡事秉公據實一無隱諱是乃人臣輸忠之極則勉之

同日又

奏為歷陳引票積弊以肅鹽政事竊照山東六府行鹽有引票之不同多寡之不一臣細加察核查登萊青三府全食票鹽東昌府全食引鹽濟南府屬之章邱鄒平淄川長山新城齊東濟陽青城新泰萊蕪武定陽信海豐樂陵濱州利津霑化蒲臺等

十八州縣并兗州府屬之沂州費縣俱食票鹽又
濟屬之臨邑陵縣德平及兗屬之郟城則引鹽票
鹽俱食至二郡所屬之別州縣則皆食引鹽雖引
鹽票鹽均辨

國課但查順治十七年長蘆鹽臣馮班條議東省票
引一疏內開查濟南府屬章邱等二十二州縣俱
行票鹽其與兗東兩郡食引鹽之州縣址壤錯接
票鹽過季方謂私鹽姦商一票到手驟馱馬載旦

暮公行一季九十日之中勤者八九次少者五六次票鹽流弊蠹

國病商乞

敕部確議悉令改引歸商等因經部議不准行今且竝不按例退銷過季之票公然運行查雍正五年七月內據護理武定營遊擊李景泰詳稱原任遊擊徐英任內拏獲鹽車五輛竝無票引經陽信縣審據商人吳裕德供稱委係夏季引鹽因持票之張

全之帶病先行等情開釋銷案又雍正五年九月
內濟南城守營把總曲成貴拏獲無票私鹽五車
先經按運二司所取商人王永升初供據稱所運
之鹽部票是春夏二季的夫春夏之票何以行銷
秋冬二季之鹽影射之明驗已彰彰畢露矣尚有
雍正四年七月內武定州拏獲無票散鹽八車行
非運鹽大路經武定州審稱押車之于現龍短少
食費赴集借錢及後到莊原帶部票不便於泥水

拏出又因雨大繩蓆霉爛將鹽砍包散裝大路泥
濘車由小路遶行等情僅以責懲銷案夫遶道卽
係販私砍包又屬違例至狡言借錢方回又不將
部票拏出驗看明係臨時影射又雍正五年五月
內武定營盤獲越境無票私鹽五車經長山縣審
稱押車之董永剛暮夜錯行道路因昏黑不將部
票給看今交撥商張奎光帶來呈驗亦以杖責銷
案均不照定例內鹽引相離同私鹽法追斷再查

東省額引四十五萬五百四十八道內除河南江南所屬十五州縣共銷引十四萬三千四百一十道此係隔省未便與東省徹底核算外其濟兗東三府食引鹽者共五十一州縣核算地丁額銀一百五十餘萬兩共銷引三十萬一千五百七十六道登萊青及濟兗二府所屬有食票鹽并引票兼食者共五十三州縣核算地丁銀一百八十餘萬兩共銷票十萬三千四百五十二道兼銷引五千

五百六十二道夫州縣之數不相上下核算地丁
數又差多而銷鹽之引與票何至多寡相去數倍
則影射侵蝕之弊不又曉然共見者耶且歷城章
邱俱屬濟南之大邑歷城編戶九十八里額徵地
丁銀六萬有餘銷引九千八百三十八道章邱編
戶一百零三里額徵地丁銀七萬有餘所銷票引
則四千一百二十八道齊河為下中之邑編戶二
十七里額徵地丁銀二萬有餘銷引四千零七道

鄒平為上中之邑編戶五十七里額徵地丁銀三萬有餘所銷票引則一千四百九十三道即此數縣而論懸殊若斯是引鹽尚藉積引以營私而票鹽更不須積引以侵蝕也蓋因商領引至場春築包鹽永阜場截一角春至蒲關秤掣截一角至灤關秤掣截一角運至州縣賣銷截一角掣鹽每季一次退引按季繳銷一季之內似難重複影射自有積引一項而重複影射之弊生若行紅扒票之

章邱鄒平齊東濟陽臨邑青城陵縣新泰德平武
定濱州蒲臺萊蕪等十三州縣稍近鹽河亦赴永
阜場春鹽將票引截一角過蒲關秤掣截一角至
州縣截一角而灤關非所經之地故不與焉較之
引鹽已少一關秤掣盤驗矣惟新泰一縣又過灤
關掣驗截一角其行黑扒票之四十州縣不近鹽
河赴各場春鹽截一角至州縣截一角姦商一票
到手一季之內時日既寬重複影射越行鄰境殆

無虛日且紅扒黑扒之票俱不按季繳銷其弊尚可問與臣謹據實奏

聞仰祈

皇上聖鑒徹底查究酌丁增額其紅黑票引立法稽察繳銷庶積弊除而鹽政肅矣為此謹

奏

此奏可嘉之至内外文武大臣留心地方事宜凡遇一切利病咸肯如此詳悉奏聞則胡弊不除曷令不行也

已有旨徹底查究矣

同日又

奏為奏

聞事竊

臣

查得雍正四年八月內原任鎮

臣

黃元驤任

內據武定營遊擊徐英詳稱巡兵張璉等於雍正

四年七月二十五日協同州役至濱州城南開河

地方拏獲私鹽九百餘包竝無引票又無人看守

隨行汛弁移州查明等情續據濱州審稱據商人

韓恒升夥計趙允琦供稱所堆包鹽並非私鹽緣
商人去年積滯部票一千道無本春運延至今年
三五月內始春完過關已經銷賣二十二包存鹽
九百七十八包籲請道憲通融代銷章邱未蒙批
允始著船戶運貯開河店旁等情審釋銷案查定
例內引票按季繳銷過季即屬違例今雍正三年
票引何以積至四年三五月始過蒲關秤掣截角
如何造冊奏銷查濱州每年額票二千七百一十

三張每季不敷七百張今狡言無本春運以至積
滯票引一千張是雍正三年秋季之內該州即無
官鹽食矣且遲至四年七月方銷二十二包則十
月之久該州豈盡食淡者乎隔年票引違例影射
實由積引一項得以藉口朦混行私臣下質庸愚
前

奏未能盡悉但臣之微忱自難逃

聖明洞鑒再有雍正五年五月內武定營拏獲無票散

鹽三車經霑化縣於七月內訊據押車之生員王
于升供稱因受暑帶票先行等因審釋詳報近於
雍正六年六月十六日始據武定營詳稱此案業
蒙院憲批示將生員王于升革頂鹽斤變價入官
准有霑化縣移覆等情即此一批與別案迥異從
前通同侵蝕之弊已可知矣臣謹據實一并奏
聞伏乞

皇上睿鑒施行謹

奏

亦有旨飭查矣

雍正六年七月二十二日山東登州總兵官

臣萬

際瑞謹

奏為奏

聞事竊臣於雍正六年五月初一日抵省會審把總曲

成貴一案業於本年六月初三日將會審情由繕

疏具

題請

旨 在案嗣後接閱邸報已於六月十八日奉

旨這事情著總督田文鏡秉公嚴審定議具奏該部知道欽此但未奉到部文不敢擅行回登茲於七月二

十日據即墨營叅將稟稱訪得萊州府屬高密縣地方一名弔莊有徐秀家一起來歷不明之人往來不定朝散夜聚正在會商縣令設法察拏隨有比鄰徐萬欽赴縣首告該汛把總隨即會同縣令

帶兵前往弔莊密行查拏已獲得徐秀徐明高哲
善楊濟張興徐廷徐可得王福臣吳應元小忙等
十名經縣審訊俱皆供係邪教又供出夥黨牛三

照供花喇張崑石張大元張華商牛明李魁元王第楚
密拏固屬應行之舉但不波及無辜又不疎漏正
倫等八名等情到臣當即飛檄該叅將照所供各
犯方為兩全其美殊非易事既供稱邪教夥黨諒其人
名居址速行密拏但恐聞風散逸臣念地方緊要
衆必多須當察係何教所為者何事聚集者何人假若
愚民雖未奉到部文不敢久羈省會茲於七月二十三
日起程回登再委幹員協緝以靖地方所有微臣

應止擒渠魁或應首從併緝要在相機酌量豈可玉石不分未奉部文回登情由理合繕摺奏聞伏乞戒者毋令兵役借端生事擾累閭閻一一詳慎為之

皇上睿鑒謹

奏

宜回本任何必等候部文

雍正六年十月初五日山東登州總兵官臣萬際

瑞謹

奏為奏

聞事竊_臣邊海庸愚謬膺封疆重寄無能報效時懷覆
餽茲蒙兵部劄開奉

旨田文鏡著授為河東總督管理山東河南二省事務
欽此_臣捧閱之下不勝欣幸獨是遙隔兩省未得
親覩儀型茲督_臣田文鏡於本年九月二十三日
以公事親赴東省濟南府_臣分宜往謁躬聆教言
藉以整飭營伍寧謐海疆且督_臣田文鏡之居心
行事悉本我

皇上之所指示洵足為法是以臣輕騎減從於十月初六日起程赴省所有微臣起程日期理合恭摺奏聞伏乞

皇上睿鑒謹

奏

此行極是應往一見者

雍正七年九月初三日浙江提督臣萬際瑞謹

奏為恭請

陛見跪聆

聖訓事竊臣閩海陋質謏劣庸材蒙

聖祖仁皇帝養深恩涓埃未效愆過頻仍復荷我

皇上如天之仁

逾格優容歷畀封疆重任犬馬圖報毫無寸績捫心自

愧夙夜靡寧今又叨蒙

殊恩補授浙江提督承

聖恩之浩蕩感激難名而下臣勉欲竭盡駑駘無如才

非經濟知乏權衡膺此海疆重寄實慮不能勝任
若非欽承

聖訓指示機宜則控馭海防茫無措施且臣自雍正三

年

陞見後迄今五載未獲趨覲

天顏犬馬依戀時切夢寐仰懇

聖慈恩准容臣輕騎馳赴

闕廷叩請

聖安跪聆

訓旨俾臣知所遵循不致隕越以曠職守誠

聖主造就之隆恩而犬馬積年戀

主之私亦得以稍展矣為此繕摺

奏請伏乞

皇上睿鑒施行謹

奏

地方緊要不必懇請赴闕李衛秉公持正實心奉職與

田文鏡同一軌轍為朕所倚信之督臣百凡領其教益而行更將從前在粵瞻顧徇隱舊習徹底洗除汝來京面聆訓旨亦不過此數語而已登鎮一任實屬無忝如能遵循弗失再加勤慎亦可以告無過矣况目今浙省一切整理無甚大費更張為難處也

所奏礮臺式樣一摺留中

雍正七年十一月二十四日浙江提督臣萬際瑞

謹

奏為請更弁兵實在食糧年月以杜頂冒事竊臣案

查雍正四年陞任江西南贛鎮臣石雲倬

奏請將各營兵丁更正實在姓名年貌奉有

俞旨欽遵在案但兵丁姓名年貌既經更正而食糧年
分仍造舊兵年月未免弊竇叢生臣蒙

皇上隆恩畀以提督重寄抵浙任事考查兵丁冊籍有
三五歲食糧者亦有未生而先食糧者種種舛謬
不止一兵一弁詰其所以僉云積習相沿失於改

正臣思名糧之確實稽察以年貌為憑歷伍之淺深考核以冊籍為據若頂接名糧仍造舊兵入伍年月則朦混頂冒之弊難以查考除現在仍令各營逐一更正外但恐與從前所送部冊不符理合據實奏

聞伏乞

皇上睿鑒施行謹

奏

凡事但當據實辦理若慮前冊不符該部駁查何難備將情由聲明也奚庸此番瀆奏

同日又

奏竊照臣標五營兵丁荷蒙

皇恩賞給銀一萬八千兩營運生息以備一時之用經原任提臣陳天培按數借給五營兵丁奉有

諭旨著陳天培一一歸還交與接任提督另行料理倘借給銀兩內兵丁有不能清還者著陳天培照數賠

補欽此欽遵經署提臣丹起鳳接蒙兵部劄付隨移

咨陳天培行催五營繳還本銀四千九百兩有零

茲臣於雍正七年十月抵寧任事復移咨行催續

據五營將備詳稱兵丁一時實難全措今又繳還

銀二千三百餘兩前後共歸還本銀七千二百餘

兩尚缺少一萬零七百餘兩伏懇來年作三季繳

還等情據此臣查原任提臣陳天培現羈江省候

質而兵丁銀兩到手俱已用去一時實難全歸可

否俟來年作三季歸還以清公項至兵丁內倘有
逃亡事故實不能清償者應於原任提臣名下照
數賠補其已歸銀兩候湊足八千之數擬交鹽道
衙門轉發殷商連環具結領運按月一分起息俱
經札商督臣李衛接准回札在案再此項本銀俟
來秋方可全完則經年利息即按陸續歸本而算
缺少實多相應一併奏請

皇上睿鑒批示以便遵行謹

奏

銀一到手自必花費無存今莫可如何只得聽其歸還耳

雍正八年三月二十五日浙江提督臣萬際瑞謹
奏為奏報雍正六年分收過公糧餉米製造軍裝甲
械數目仰祈

睿鑒事竊照浙省各標協營歲需製造修整軍裝甲械
等費自雍正五年四月內經前任提臣石雲倬

奏定每兵一百名准留公糧守餉三分按年製造修整軍械業經接任提臣陳天培將雍正五年四月起至雍正六年二月止通省各標營收過公糧製造軍械總數具摺

奏報在案今臣於雍正七年十月內到任檢查雍正六年分公糧開銷數目未經

奏報當將各標協營送到雍正六年三月起至歲底止公糧製造各項軍裝所開工料價值逐細查核

多寡不同恐有浮冒濫銷情弊隨經一一親行弔
驗內惟紹協製造藤牌片刀牌刀三項造不合式
現在飭令重造賠補外今臣查得浙江通省各標
協營馬步水戰守兵共四萬九百零五名除各官
隨丁外應存公糧守餉一千一百一十八名自雍
正六年三月起至十二月止共餉米銀一萬三千
四百七十四兩零又撫標營自雍正五年六月起
至雍正六年十二月止共計收過餉米銀二百七

十二兩零通省合共收過公糧餉米銀一萬三千七百四十六兩零謹將雍正六年分製造過軍裝甲械數目另單臚列恭呈

御覽共計用過銀九千八百二十七兩零又加雍正五年分透用銀二千五百九十六兩零二共用銀一萬二千四百二十三兩零內撫標前因公糧不敷經督臣李衛給發鹽庫公項銀七百四十兩零添用外通省標營共於收存公糧餉米銀內動用過

銀一萬一千六百八十二兩零實浮存銀二千六十四兩零留為次年應用為此繕摺

奏報伏乞

皇上睿鑒施行謹

奏

此不過一筆花帳朕奚暇觀覽既未委員查核亦何足為憑且未有如此瑣屑煩瀆之理據奏陳天培將雍正五年分總數奏報在案等語汝今踵陳天培之故步無

非欲令將來代替之人效法汝所為耳倘遇有識見者
斷不蹈襲斯等庸愚轍迹依樣葫蘆汝意或以曾秦過
三字作為張本冀免日後敗露之虞乎汝自抵浙以來
兵民交怨聲名甚劣里巷之間有李太保督浙萬民安
業萬提督到任闔省胥讒之謠未知得聞否也汝前在
粵諸事瞻徇朕訓汝振作者整理戎政操練營伍之謂
豈令不論是非曲直一味苛刻耶從來下愚伎倆非過
則不及奈何奈何試觀李衛竝非優柔沾譽之人輿情

之不怨而感者以其善善惡惡咸出於公也今汝偏於
搜求刻厲欲以仰合朕意專事嚴峻操切以防督臣叅
論滿懷皆係假公濟私之心寧有不招衆怨沸騰者乎
朕意無他惟喜適中合理而已假若憾朕以為寬嚴均
屬不可殊難為官乃汝過當不能折中之故於朕何尤
似此不知自反庸愚鄙見朕俱洞鑒無遺且朕諄諄命
汝凡事呈請督臣指示而行係極易為之舉汝必不肯
一一就近領教是誠何心朕實不解將此諭亦令督臣

李衛知之

雍正八年六月十一日浙江提督臣萬際瑞謹

奏為

聖恩高厚難名微臣罪愆莫追謹恪遵

聖訓以圖報效事雍正八年五月初八日臣標千總齎

捧臣奏報雍正六年分收過公糧餉米製造軍裝

甲械數目一摺到臣奉有

硃批諭旨臣跪讀之下驚惶恐懼手足無措伏念臣邊

海庸愚毫無知識蒙

皇上天恩屢膺封疆重寄愆過頻仍無能報稱感荷

帝德如天逾格生成復畀浙江提督鉅任臣自當竭盡

駑駘整飭營伍凡事求於適中合理而行乃臣闇

劣不明識量褊急心惟欲速以至嚴刻誠如

聖明訓飭非過則不及也但臣於本年正月二十五日

接准督臣李衛來札後深自改悔今蒙

聖恩不即加以重譴

訓誡諄諄撫膺自問感泣欲絕惟有痛加砥礪勉力自
新圖報

高厚於萬一耳至公糧製造軍械嗣後當遵

旨委員察核取結

奏報仰祈

天恩恕臣已往容臣諸事會商督臣李衛圖報將來臣
不勝惶悚戰慄負罪陳

奏所有奉到

硃批諭旨

臣

欽遵敬錄寄知督

臣

李衛外謹此繕摺叩

謝

天恩伏乞

皇上睿鑒謹

奏

必待朕之訓誡督臣札致然後改悔如是左提右攜前
挾後扶何有休歇究須克勉中道方能自立也

雍正八年十二月初五日浙江提督

臣

萬際瑞謹

奏為奏報雍正七年分收過公糧製造軍械數目仰
祈

睿鑒事竊照調任提臣石雲倬

奏請將浙省各標協等營存留公糧修製軍裝甲械
一案自雍正七年正月至十二月又屆報銷之期
據各標協營送到製造各項軍裝工料價值細冊
前來臣隨委將備等官一十二員分路逐一點驗
竝無苟簡浮冒取有核實冊結在案今臣查得浙

江通省各標協營並撫標營雍正七年分共收過
公糧餉米銀一萬七千六百二兩零除將造過軍
裝甲械數目另單臚列恭呈

御覽外共計雍正七年分用過銀一萬三千二百六兩
零餘剩銀四千三百九十六兩零并雍正六年分
舊存銀二千六十四兩零二共存銀六千四百六
十兩零留為次年應用至所造軍裝甲械等物俱
經臣逐項吊驗之後即令送赴督臣李衛會驗悉

屬堅利鮮明堪以禦用理合繕摺

奏報伏乞

皇上睿鑒施行謹

奏

所奏朕不過一覽而已諸凡總聽督臣李衛訓誨指示
為之

雍正九年十一月二十六日浙江提督臣萬際瑞
謹

奏為奏報雍正八年分收過公糧製造軍械數目仰
祈

睿鑒事竊照浙省各標協等營存留公糧修製軍裝一
案自雍正八年正月至十二月又屆報銷之期據
各標協營送到造製軍裝工料價值細冊前來臣
隨委將備分路逐一點驗悉屬鮮明堅利並無苟
簡浮冒取有核實冊結在案今臣查得浙省各標
協營並撫標營雍正八年分共收過公糧餉米銀

一萬五千七百九十一兩零除將造過軍械數目
另單開呈

御覽外共計雍正八年分用過銀一萬一千九十四兩
零餘剩銀四千三百九十六兩零并雍正七年分
舊存銀六千四百六十四兩零二共存銀一萬八
百五十七兩零留為次年應用謹此繕摺

奏報伏乞

皇上睿鑒謹

奏

全不仰體朕躬日理萬幾何暇觀汝帳目

雍正十年三月初八日浙江提督臣萬際瑞謹

奏為恭報微臣查閱營汛回署日期事竊臣因浙省

幅員廣濶營汛兵馬竝沿海一帶必須親歷巡查

考察以為勸懲業於上年十一月二十六日自省
會起行

奏報在案隨即於嚴協起巡至處屬次歷溫黃及定

標沿海一帶由鎮海回營周遍查察較閱兵馬技藝俱各竭力整頓營伍可觀兵民和輯其內優者則黃巖鎮標暨玉環大荆瑞安樂清平陽等營間有優劣不等者則鎮海寧海象山太平等營經臣訓飭各將備弁員勤加督率操演務令俱臻純熟以仰報

國恩止有楓嶺磐石二營技藝生疎訓練乏術除嚴飭勒限學習另行委員點驗外倘再怠忽不改即

當咨明督臣李衛會疏

題叅底躁妄疲懦者知所做戒矣茲臣於本年三月初四日已抵寧波駐劄衙門所有回署日期理合繕摺奏

聞伏乞

皇上睿鑒謹

奏

似此訓練乏術溺職將弁不以彈劾示懲必容至怠忽

不改方始咨會題叅因曾效力行間耶抑或其人另具
超卓之才耶殊為朕所不解此下復云庶使躁妄者知
戒等語更屬不可解矣

雍正十一年七月二十四日浙江提督臣萬際瑞
謹

奏為奏

聞事雍正十年六月二十八日寧郡風勢稍異平時經
臣委員查勘船隻田禾俱無傷損定黃二鎮洋汛

亦均獲安寧惟溫屬之玉環瑞安二營出哨船隻

准據署溫州鎮

臣

黃有才并玉環營叅將顧元亮

稟報稱守備邱宗義管坐晏字八號戰船齎令出
洋於六月二十八日遇颶至二更時分風勢愈猛
將船打至官山洋面擊碎淹斃兵丁一十九名守
備邱宗義抱板得生腿脚受傷又據署瑞安營副
將魏國泰詳報千總楊元管坐清字五號戰船是
日遇颶至夜將船打至黃家山下擊碎千總楊元

抱漿得生腰足被傷淹斃兵丁三名又功加林逢
春管坐清字九號戰船內兵三十名餘丁二名同
時遇颶飄失無蹤沿邊水陸探訪尋至虎石坑見
有本船字號推牕板并碁盤蓋後艖等物又本船
兵丁姓名年籍腰牌以及鎗殼火箭桿各項形迹
是該船實係沉失等情到臣除一面確查九號船
隻兵丁有無飄存島嶼或全被淹溺再行咨明督

臣
程元章查核會

題并將淹斃功加及各兵眷口量加撫恤外事關海
洋颶風損壞兵船合先具摺

奏報伏乞

皇上睿鑒謹

奏

汝之統屬內有此災異亟當懺過省愆必汝居心行事
不公不誠所以招致咎徵也慎之毋忽

雍正十一年十二月初一日浙江提督臣萬際瑞

謹

奏為欽遵

聖訓恭繳

硃批事雍正十一年九月初八日臣標千總齊田臣奏

報洋汛兵船遇颶一摺欽奉

硃批汝之統屬內有此災異亟當懺過省愆必汝居心
諭甚明晰何乃妄解錯會至於風馬牛不相及耶
行事不公不誠所以招致咎徵也慎之毋忽欽此竊

照臣屬瑞安玉環二營戰船官兵今夏遇颶雖云

事出天災實由臣職未盡荷蒙

聖訓令臣懺過省愆臣查功濟海洋惟

汝父當日若似汝之居心

天后神明靈應如響臣父正色於康熙十九年克復

神靈

斷無協助之理

廈門深荷神靈協助今臣齋虔致敬已於

天后宮禮懺三日并於寧郡城齋僧五百衆祈求風

災永息外伏念臣閩海庸愚智識短淺才乏強毅

今荷

聖恩諄切訓諭敢不矢公矢誠以竭盡犬馬餘年力圖

報效所有微臣感激蟻悃理合繕摺

奏謝并將奉到

硃批一併恭繳伏乞

皇上睿鑒謹

奏

朕命汝懺過省愆者專指居心行事不公不誠如不肯
訓愛兵弁偏於好惡但知獨善己身而不竭力奉公而
言也將此等過愆洗滌淨盡改行易慮庶幾減贖前罪

若徒恃

天后宮禮懺齋僧以為能遵訓諭不特錯會朕意亦屬庸
愚無識可笑之極矣似此懵懂昏昧宜乎頻招

責也慎之戒之



硃批諭旨卷一百五十九



總校官庶吉士臣侍朝

校對官編修臣馬啟泰

謄錄監生臣陳肇麒